

Հայաստանի Հանրապետության Արարատի մարզպետարանը, ի դեմս մարզպետ Վարդդես Հովակիմյանի, մի կողմից, և «Հայաստանի երիտասարդ իրավաբանների Ասոցիացիա» հասարակական կազմակերպությունը (հետագա տեքստում՝ Ասոցիացիա) ի դեմս Ասոցիացիայի նախագահ Կարեն Զադոյանի, մյուս կողմից (հետագա տեքստում՝ Կողմեր)։

Կարևորելով տարածքային կառավարման մարմիններում կոռուպցիոն ռիսկերի նվազեցման և կառավարման արդյունավետության բարձրացման մեթոդական ու մեթոդաբանական օժանդակության հրատապությունը,

Անհրաժեշտ համարելով պետական կառավարման (այդ թվում՝ տարածքային կառավարման) մարմինների կողմից պետության անունից հանրությանը մատուցվող ծառայությունների որակի բարելավումը,

Զգտելով հնարավորին չափ նպաստել քաղաքացիների շահերի և իրավունքների ոտնահարման կանխարգելմանն ու որոշումների կայացմանը նրանց անմիջական մասնակցության ապահովմանը,

Առաջնորդվելով օրենքի գերակայության և բարոյական վարքագծի հավասարակշռությամբ, առաջնայնություն տալով մարզպետարանում պետական ծառայողի բարոյական վարքականոնի մշակմանը և ներդրմանը,

Գնահատելով Ասոցիացիայի դերը որպես կոռուպցիայի հաղթահարման ոլորտում իր ներկայացուցչական ստորաբաժանումների շրջանակներում մարզպետարան-քաղաքացի հարաբերություններում տեղեկատվության փոխանակման լրացուցիչ միջոց,

Ընդգծելով տարածքային կառավարման և տեղական ինքնակառավարման մարմինների հարաբերությունները կարգավորող արդեն ընդունված և ընդունվելիք նորմատիվ ակտերի վերաբերյալ կայացվող որոշումները հրապարակային և թափանցիկ դարձնելու, տեղում լուսաբանելու, ծիշտ ըմբռնելու ու կյանքի կոչելու գերակայությունը,

Կողմերը կնքեցին սույն Փոխընթացման Հուշագիրը (հետագա տեքստում՝ Հուշագիր) հետևյալի մասին.

1. Հուշագրի նպատակները

1.1. Կողմերը միավորում են ջանքերը հետևյալ նպատակներով՝

- նպաստել ՀՀ Արարատի մարզում կոռուպցիայի կանխարգելմանը և կոռուպցիոն ռիսկերի նվազեցմանը,
- աջակցել ՀՀ Արարատի մարզում կոռուպցիայի դեմ պայքարի արդյունավետության բարձրացմանը,
- բարձրացնել ՀՀ Արարատի մարզի բնակչության կոռուպցիայի դեմ պայքարի անհրաժեշտության վերաբերյալ իրազեկության մակարդակը,
- նպաստել կոռուպցիայի դեմ պայքարում քաղաքացիների շահերի և իրավունքների պաշտպանությանը,
- նպաստել կոռուպցիոն ռիսկեր պարունակող օրենսդրության ընթացակարգային և համակարգային փոփոխությունների կատարմանը:

2. Համագործակցության հիմնական սկզբունքները

2.1. Սույն Հուշագիրը սահմանում է Կողմերի միջև համագործակցության հետևյալ սկզբունքները.

- Կողմերի միջև համագործակցությունը հիմնված է ՀՀ Սահմանադրության, ՀՀ օրենսդրության, ՀՀ միջազգային պայմանագրերի և սույն Հուշագրի դրույթների վրա,
- Համագործակցության ընթացքում Կողմերն առաջնորդվում են համադեկլարման, համապատասխան պատասխանատվության, թափանցիկության և ժողովրդավարության սկզբունքներով:

3. Համագործակցության ուղղությունները

3.1. Կողմերը համաձայնվում են ԱՄՆ ՄՁԳ Հակակոռուպցիոն գործողության մոբիլիզացման ծրագրի կողմից ֆինանսավորված և ասոցիացիայի կողմից իրականացվող «Հրազդան, Եղեգնաձոր, Արարատ, Աշտարակ, Ապարան և Թալին քաղաքներում շահերի պաշտպանության և աջակցման կենտրոններ ու ընդունարաններ» ծրագրի շրջանակներում, հետագայում նաև ասոցիացիայի կողմից իրականացվելիք համանման այլ ծրագրերի շրջանակներում նույնպես, ՀՀ Արարատի մարզում իրականացնել հետևյալ գործունեությունը.

3.1.1. Ասոցիացիան պարտավորվում է՝

- Քաղաքացիներին հնարավորություն ընձեռել արձանագրելու իրենց հանդիպած կոռուպցիոն դեպքերը և բողոքներ ներկայացնելու մարզի պետական կառավարման և տեղական ինքնակառավարման մարմիններին,
- Տրամադրել անվճար իրավաբանական աջակցություն՝ պետական և տեղական ինքնակառավարման մարմիններին ուղղված դիմումների ընթացքին օժանդակելու նպատակով,
- Բացահայտել կոռուպցիային վերաբերող օրենքների և այդ օրենքների ու որոշումների իրականացման թերությունները, ինչպես նաև մարզի պետական կառավարման և տեղական ինքնակառավարման մարմիններում առկա կոռուպցիոն ռիսկեր պարունակող գործունեության տեսակները՝ անմիջապես տուժող անձի կողմից ներկայացված արձանագրության հիման վրա,
- Մինչ բացահայտված կոռուպցիոն դեպքերի հանրայնացման և օրենսդրորեն նախատեսված այլ ընթացակարգերի ապահովումը, գործընկերության հիմքի վրա մարզի պետական կառավարման և տեղական ինքնակառավարման մարմինների հետ համատեղ քննարկում ծավալել կոռուպցիոն տարրեր ընդգրկող դեպքերի կապակցությամբ, համատեղ եզրահանգումների ակնկալիքով,
- Ապահովել քաղաքացիների և քաղաքացիական հասարակության կազմակերպությունների մասնակցությունը՝ տարածքային կառավարման և տեղական ինքնակառավարման մարմինների կողմից քաղաքացիներին մատուցվող ծառայությունների որակի գնահատման նկատմամբ մասնակցային մոնիտորինգի իրականացմանը:

3.1.2. Մարզպետարանը պարտավորվում է՝

- Աջակցել Ասոցիացիայի կողմից քաղաքացիներին տրամադրվող այն տեղեկատվության ամբողջացմանը, որն անմիջականորեն կապված է քաղաքացիների բողոքներին առնչվող օրենքներով, ենթաօրենսդրական ակտերով, կանոնակարգերով կամ ներքին փաստաթղթերով պայմանավորված ընթացակարգերի հետ,
- Հիմնվելով ասոցիացիայի կողմից մարզում գործարկվող Շահերի պաշտպանության և աջակցության ընդունարանի (հետագա տեքստում՝

ՇՊԱԸ) կողմից հավաքագրված և վերլուծված տեղեկատվության վրա՝ օրենքով վերապահված լիազորությունների շրջանակներում, նախաձեռնել կոռուպցիոն ռիսկեր պարունակող օրենսդրության ընթացակարգային և համակարգային փոփոխություններ,

- Նախաձեռնել, Կողմերի մասնակցությամբ, մարզպետարանում՝ քաղաքացիական ծառայողների, իսկ տեղական ինքնակառավարման մարմիններում՝ համայնքային ծառայողների էթիկայի կանոնների կիրառման համար անհրաժեշտ ինստիտուտների ներդրմանը, այդ ինստիտուտներում ապահովելով քաղաքացիական հասարակության ներկայացուցիչների ներգրավվածությունը,
- Աջակցել ՇՊԱԿ-ի առաջարկություններին, մասնավորապես՝ տարածքային կառավարման և տեղական ինքնակառավարման մարմինների կողմից քաղաքացիներին մատուցվող ծառայությունների որակի գնահատման նկատմամբ մասնակցային մոնիտորինգ իրականացնելու նախաձեռնություններին:

3.1.3.Այլ դրույթներ

- Պարբերաբար աշխատանքային քննարկումներ կազմակերպել կողմերի ներկայացուցիչների մասնակցությամբ քաղաքացիների դիմում բողոքներին ընթացք տալու և դրանք բավարարելու օրենքով նախատեսված ընթացակարգերը ճշգրտելու օրակարգերով,
- Կողմերից որևէ մեկի առաջարկության դեպքում Մարզպետի մոտ անց է կացվում խորհրդակցություն՝ ճշտելու համար ՇՊԱԸ-ի և պետական կառույցների համատեղ գործունեության հարաբերությունները:

4. ԵԶՐԱՓՈՎԿԻՉ ԴՐՈՒՅԹՆԵՐ

4.1. Սույն Հուշագրով սահմանված համագործակցությունը համակարգվում և վերահսկում են Կողմերի ղեկավար մարմինները՝ լիազորված անձանց միջոցով:

4.2. Սույն Հուշագիրը կազմված է երեք էջի վրա, հայերեն լեզվով, հավասար իրավաբանական ուժ ունեցող երկու օրինակներից:

4.3. Սույն Հուշագիրը ուժի մեջ է մտնում ստորագրման պահից:

ՀՀ Արարատի մարզպետ՝	«Հայաստանի երիտասարդ իրավաբանների Ասոցիացիա» հասարակական կազմակերպության նախագահ՝
Վարդգես Հովակիմյան	Կարեն Զադոյան
 <p>4.S</p>	 <p>4.S</p>